



19 da settembre 2023

Communicaziun a las medias

Basilea, Engiadina Scuol Zernez e Val Müstair e la Surselva,
classifitgadas cun success sco emprimas «Swisstainable
Destination»

En il rom da l'ulteriur svilup dal program da persistenza Swisstainable ha la Federaziun svizra dal turissem, ensemens cun la Scola auta da Lucerna ed ulteriur(a)s partenari(a)s lantschà «Swisstainable Destination» l'avrigl 2023. Cun quai han destinaziuns turisticas da nov la pussaivladad da participar al program da persistenza Swisstainable entaifer lur champ d'activitat sin il nivel da la destinaziun. Gia in mez onn suenter il schlargiament dal program adempleschan cun Basilea, Engiadina Scuol Zernez e Val Müstair sco er la Surselva trais destinaziuns turisticas las pretensiuns e pon vegnir classifitgadas sco Swisstainable Destinations

Basilea, Engiadina Scuol Zernez e Val Müstair sco era la Surselva èn las emprimas trais destinaziuns che han absolvì cun success il schlargiament dal program sin nivel da la destinaziun e che pon ussa sa numnar «Swisstainable Destination». Ellas sa pon uschia posiziunar sco destinaziuns cun gronda responsabludad e prestan ina contribuzion impurtanta per in turissem svizzer persistent. Basilea e la Surselva èn vegnids classifitgads da nov sin il nivel I – committed. Engiadina Scuol Zernez e Val Müstair ha reussì l'entrada en il nivel III – leading. Ultra da differentas documentaziuns inoltradas sa basa questa pli auta qualificaziun sin la certificaziun TourCert che cumpligia tut las destinaziuns sco era ina gronda cumpart da manaschi en la destinaziun sezza che sa participeschan sin nivel da manaschi a Swisstainable e s'engaschan uschia per in svilup persistent.

Destinaziuns da pilot sco buns exemepels

Las organisaziuns Basel Tourismus e Turissem Engiadina Scuol Samignun Val Müstair SA (TESSVM) èn sa messas a disposizion sco destinaziuns da pilot gia avant l'entschatta uffiziala ed han uschia pudì contribuir experientschas e resuns da valur che èn vegnids integrads en il svilup dal project. «A la fin èsi decisiv che tut ils participads cundividan la finamira communabla d'ina destinaziun persistenta e s'engaschan da maniera activa per questa finamira. Cun ina stretga collavuraziun ed il barat da Best Practices po la via a la Swisstainable Destination vegnir realisada cun success», di Letizia Elia, directura da Basel Tourismus.

En domaduas destinaziuns n'è la persistenza betg in pled nov, ella vegn vivida gia dapi onns da different(a)s partenari(a)s. «Cun il program da destinaziun da Swisstainable vulain nus dar dapli visibilitad a nossas partenarias e noss partenaris», di Sophia Bartolomei, manadra da management da products tar TESSVM, «Il program ans gida era da chapir meglier las mesiras da persistenza da noss(as) partenari(a)s e da nizzegiar sinergias pussavilas. Intern avain nus elavurà ina glista da controlla per examinar noss products e nossas purschidas en las trais dimensiuns da la persistenza. Plinavant avain nus elavurà per scolaziuns in manual per ina moda da lavour persistenta.»

Novas vias en Surselva

«Nus ans legrain che la destinaziun turistica Surselva è vegnida recepida en il program da persistenza Swisstainable sco ina da las emprimas destinaziuns en Svizra. Nus essan loschs ed engraziaivels che tants manaschis turistics e tantas vischnancas vulan prender per mauns, ensemen cun nus, las schanzas e las sfidas d'in svilup persistent», manegia Kevin Brunold, CEO da la Surselva Turissem SA. L'organisaziun è s'associada a l'entschatta dal 2023 al program da Swisstainable sin nivel da manaschi. Entaifer curt temp ha ella pudì far gia in grond pass en direcziun destinaziun persistenta. Usits e tradiziuns duain vegnir mantegnids e sviluppads vinavant ed ina convivenza armonica da la populaziun indigena cun ils giasts duai vegnir promovida. Cun il program da persistenza Swisstainable vul la destinaziun render visiblas las iniziativas da persistenza, dar novs impuls per il svilup persistent da la regiun e prestar ina contribuziun per segirar l'avegnir dals manaschis turistics. Per che questa via possia vegnir cuntuada cun success èn differentas vischnancas da la Surselva vegnidadas involvadas en il process per la destinaziun Swisstainable en collavuraziun cun la Scola auta spezialisada da Turitg (ZHAW), ed ils manaschis regiunals èn vegnids accumpagnads da studentas e students tar il process da classificaziun dal program da manaschi. Quai mussa da maniera exemplarica che la collavuraziun e l'engaschament da tut las partidas participadas èn centrals per in svilup persistent da la destinaziun.

Dal nivel I – committed al nivel III – leading: trais stgalims da la persistenza

Il program da destinaziun è vegnì sviluppà sut l'egida da l'Institut per turissem e mobilitad da la Scola auta da Lucerna en collavuraziun cun Svizra Turissem e la Federaziun svizra dal turissem, sustegnì da las associaziuns professiunalas. Swisstainable Destination è structurà en trais niveis sco tar il program da basa per manaschis, per resguardar ils differents puncts da partenza en relaziun cun persistenza ed ils differents grads da l'engaschament da la destinaziun turistica. Tuts trais niveis han sco fundament il committement, la structura e la gestiun d'in post da controlla per persistenza, l'integrazion da la persistenza en la strategia da la destinaziun, in plan da mesiras concret, in tschert dumber da manaschis da Swisstainable en l'atgna destinaziun, sco era ina communicaziun activa. A partir dal nivel II – engaged, vegn pretendì in monitoring cuntuant dad indicaturs da persistenza. Sche las destinaziuns disponan era anc d'ina certificaziun da persistenza sin nivel da la destinaziun, pon ellas dumandar II nivel III – leading.

Cun la Swisstainable Destination vegn mess in ulteriur crap da fundament per concentrar las forzas per lung da l'entira chadaina da creaziun da valur turistica e per prender tut las acturas ed ils acturs sin il viadi ad in Svizra sco pajais cun in turissem persistent. Enfin ussa èn gia ulteriuras 20 destinaziuns turisticas en il process d'annunzia sco destinaziuns Swisstainable.

((Infobox))

Swisstainable – Program da persistenza per il turissem svizzer

Swisstainable è vegnì sviluppà il 2021 sco program da persistenza “or dal turissem per il turissem” da Svizra Turissem, ensemencun la Scola auta da Lucerna e cun il sectur da turissem svizzer. Dapi il 2022 sa chatta il secretariat en il center da cumpetenza per persistenza (KONA) tar la Federaziun svizra dal turissem. Il program da persistenza crescha cuntuadament dapi l'introducziun en il martgà avant dus onns e mez: Entant s'engaschan già passa 2300 manaschis turistics da l'entira Svizra e dal Principadi da Liechtenstein cun mesiras concretas per in svilup persistent. Il program sustegna manaschis turistics da realisar persistenza en la pratica. Cun quai suttastritga Swisstainable la relevanza dal tema per il posiziunament futur da la Svizra sco pajais da turissem persistent e presta ina contribuzion impurtanta per cuntanscher las 17 finamiradas da persistenza (Sustainable Development Goals) en il rom da l'agenda 2030. Il program n'è nagina certificaziun, el sa referescha a certificaziuns da persistenza existentes naziunalas ed internaziunalas. Swisstainable renda pli visibel l'engaschament da persistenza dal sectur da turissem e creescha transparenza ed orientaziun per ils giasts.

Per infurmaziuns As stattan a disposiziun:

Federaziun svizra dal turissem

- Philipp Niederberger | directur | +41 31 307 47 55 | philipp.niederberger@stv-fst.ch

Svizra Turissem

- Communicaziun da l'interpresa | +41 44 288 13 17 | media@switzerland.com

Scola auta da Lucerna, Institut per turissem e mobilitad ITM

- Prof. dr. Jürg Stettler | manader da l'institut | +41 41 228 41 46 | juerg.stettler@hslu.ch

Maletgs: Maletgs pon vegnir chargiads giu qua. Per plaschair resguardar il copyright en la descripziun dal maletg.

Dapli davart Swisstainable Destination: [Swisstainable Destination – il program da persistenza per destinaziuns](#)